


DUSHI BAND NO POR PARTICIPA DEN ARUBA SU CARNAVAL 45..

Hildward Croes a viaha pa graba cu Chichi Peralta

...Tambe lo ta den gira na Viña del Mar y Peru..

Fotos/texto:Poets

DEN AMBIENTE



** Diahuebs Aruba su orguyo musico internacional Hildward Croes a sali pa Republica Dominicana, pa asina hunto cu Chichi Peralta viaha pa New York, na unda Hildward Croes tin cu realiza su participacion den e grabacion di e proximo CD di Chichi Peralta y Son Familia.

Mientras cu dia 11 di februari proximo, Hildward Croes lo sali hunto cu e orquesta di Chichi Peralta y Son Familia pa Chile, na unda diasabra 13 di februari nan lo duna nan presentacion durante e magno festival Viña del Mar, cual festival ta ser concidera como esun mas importante pa cualkier artista di henter e continente habla hispano.

Diadomingo 14 di februari, Chichi Peralta y Son Familia lo viaha pa Lima, Peru, na unda nan lo duna dos presentacion, dia 18 y 20 di februari. Dia 21 di februari nan lo viaha bek pa Republica Dominicana.

Ta pa e motibo aki tambe aña aki Dushi Band no

por participa durante e grandioso celebracion di Aruba su Carnaval 45, ya cu ta Hildward Croes ta e motor clave di Dushi Band. Por a compronde for di Hildward Croes, cu net e aña aki el a haya un tremendo oferta pa ta den parada, pero su trabao profesional ta na prome lugar. Cu esaki tambe Hildward Croes ta demostra su disciplina y seriedad como un musico profesional internacional.

DEN AMBIENTE tambe a haya e honor pa forma parti di e delegacion di Chichi Peralta y Son Familia como nan fotografo den e gira aki. DEN AMBIENTE lo tin cu viaha pa Republica Dominicana diahuebs dia 11 di februari, pa asina hunto cu e delegacion realiza e viahe pa Chile y Peru.

Pues DEN AMBIENTE tambe lo perde e gran celebracion di Aruba su Carnaval 45, pero di otro banda lo realiza e soño di por cubri e magno festival di Viña del Mar, cual sin duda lo bay ta uno inolvidable..

A BIRA TEMPO PA E HURADONAN CUMINSA DUNA VALOR NA ARUBA SU PROPIO RITMO Y IDENTIDAD CARNAVALESKO...


** Un biaha mas Aruba su Carnaval a haya un dushi ritmo nobo pa goza durante e grandioso celebracion di 45. E ritmo nobo aki ta net loke nos carnavalistanan ta gusta ya cu nan por goza den un forma agradable y relahante durante e parada. Aña pasa Aruba a goza inmensamente di e dos hitnan carnavalesco cu tabata "Wapa E" y "Huppelen", cual porcierto hasta e "Wapa E" a ser proclama como e roadjam di aña. Ya a bira un custumber cu e cancionnan aki durante e Calypso & Roadmarch Contest no ta haya nan debido atencion serca e cuerpo di hurado y no ta conta como un ganador. Pero despues di e contest, ora cu e cancionnan aki cuminsa resona na e diferente radio emisoranan y durante tur e eventonan carnavalesco, e ritmo ta haya su merecido acohiba serca e pueblo carnavalesco.

Tur cos ta mustra cu e aña aki un biaha esaki lo bay ta e caso, ya cu e pueblo carnavalesco a cuminsa namora cu e can-

cionnan di Boysie Croes "Boy King Jam" y tambe esun di Nando Chirino "Rema" y sin kita afor esun "Chicken Heads" di Dito Rogers di Choeps, cual ya caba a conquista curasonan di e pueblo carnavalesco.

Esaki ta inovacion nobo den e ritmo carnavalesco propio estilo Arubiano, pa cual mester duna tur elogio y credito na e maestro Chucho Hoek kende ta e creador di e ritmo aki cu sin duda algun a trese un dimension nobo den e mundo di musica carnavalesco aki na Aruba, cual ta uno den su propio estilo y identidad.

Ta lamenta si cu e huradonan ainda no ta capta e inovacion nobo aki y ketu bay ta biba den un mundo di pasado cu cancionnan estilo dragrace y care-da di cabay. Tambe a bira tempo pa ASOMA cuminsa otorga premio na e mihor compositoran y areglistanan, pa di



e forma aki tambe duna valor y motivacion na e creadornan aki pa asina tambe engrandece y duna mas calidad na nos propio musica carnavalesco.

Esaki ta DEN AMBIENTE su humilde opinion...

MERITO PA E TEAM PERFECTO...



** E Team Perfecto durante Festival di Calypso & Roadmarch (d.r.p.): Miky Gravenhorst, Amayra Boekhoudt, Ruben Garcia, Sandra Paesch y Jubi Naar..

** Hopi biaha ta lubida riba esnan cu merece nan elogio y merito pa nan bon trabao realiza. DEN AMBIENTE no por keda sin duna palabranan di elogio na e team profesional aki cu a sa di realiza un fabuloso trabao durante tanto e Festival di Tumba y Calypso & Roadmarch Contest.

Miky Gravenhorst na timon como stage manager y su staff consisti di Sandra Paesch, Amayra Boekhoudt y Omayra Bikkér,

tabata esnan cu a percura pa ambos di e festivalnan por a cana manera debe ser y termina den un tempo record.

Jubi Naar maestro di ceremonia cu amplio experiencia pa hopi aña caba durante e festivalnan aki y respeta como un gran periodista cu ta promove carnaval, mester bisa cu su presencia riba escenari-so, ta un gran estimulo pa tur e participantenan y musiconan.

Ruben "Scorpio" Garcia como

maestro di ceremonia, ya caba esaki ta un garantia cu e publico ta den un bon ambiente, ya cu Ruben Garcia tin e don y talento pa anima un publico.

DEN AMBIENTE kier a felicita ASOMA tambe di por a escohe e team perfecto aki, cual resultado a sali perfecto tambe. Ta di spera cu otro aña tanto Festival di Tumba y Calypso & Roadmarch por goza un biaha mas di e team perfecto aki..